



Ayat Suci Minggu ini

1 Raja-Raja 19: 9, 11-13

Mazmur 84: 9-14

Roma 9: 1-5

Matius 14: 22-33



"Walaupun berbeza etnik dan bahasa, komuniti kita terjalin dengan baik dalam satu Tubuh, satu Roh dan satu Gereja. Sinodaliti merupakan cara yang biasa, realiti harian, bagi kita."

Kardinal Sebastian Francis

EDARAN DALAMAN SAHAJA
BUL 32/2026

Menjadi rakyat Malaysia bererti kita sudah pun tergolong dalam sebuah kisah yang kaya dan berlapis. Seseorang mungkin merupakan seorang Katolik Cina Peranakan yang bertutur dalam bahasa Inggeris, dibentuk oleh keluarga, bahasa, budaya, penghijrahan, dan sejarah. Seorang yang lain mungkin berbangsa Iban, Kadazan Dusun, India, Eurasia, bertutur dalam bahasa Melayu, Mandarin, Tamil, atau dibentuk oleh kehidupan di Sabah, Sarawak, atau Semenanjung. Setiap orang membawa kurnia yang unik kepada Gereja.

MPC 2026 menghimpunkan kepelbagaian ini. Ia bukan sekadar satu pertemuan, tetapi tanda hidup bersatu dalam kepelbagaian, yang mana pelbagai bangsa dan tradisi Gereja Malaysia berkumpul untuk mendengar, menimbang rasa, dan berjalan bersama.

Kita sedikit sebanyak mengetahui makna tergolong dalam Gereja Katolik sejagat. Kita mengalaminya apabila umat Katolik dari banyak negara berkumpul untuk Misa Paus, Hari Belia Sedunia, atau perayaan iman besar yang lain. Di situ, Gereja benar-benar terasa bersifat sedunia. Namun, apakah maknanya menjadi tempatan?

Konsili Vatikan Kedua membantu kita dalam hal ini. Dalam Lumen Gentium, Gereja difahami sebagai sejagat dan tempatan. Gereja sejagat tidak jauh daripada kita, ia hadir dalam setiap Gereja tempatan. Sebuah Gereja khusus, biasanya sebuah keuskupan di bawah kepimpinan uskupnya, merupakan sebahagian sepenuhnya daripada Gereja Katolik yang satu, sambil membawa bahasa, budaya, sejarah, dan cara hidup imannya sendiri.

Paus Fransiskus menyatakan hal ini dengan jelas dalam Evangelii Gaudium. Setiap Gereja khusus ialah Gereja yang "menjelma di suatu tempat tertentu," dengan segala yang diberikan oleh Kristus untuk keselamatan, namun juga "dengan ciri-ciri tempatan" (EG 30).

Apabila kita bercakap tentang Gereja Malaysia, kita tidak bercakap tentang sebuah Gereja yang terpisah daripada Roma atau daripada Gereja sejagat. Kita bercakap tentang iman Katolik yang dihayati di sini, dalam kalangan bangsa kita, dengan bahasa, budaya, luka, kurnia, dan harapan kita.

Dengan menghimpunkan Sabah, Sarawak, dan Semenanjung dalam satu ruang untuk mendengar dan menimbang rasa, MPC 2026 menjadi kesaksian tentang bagaimana Gereja yang satu, kudus, katolik, dan apostolik dihayati di Malaysia pada hari ini. Kita tidak menjadi lebih Katolik dengan menjadi kurang Malaysia. Sebaliknya, Injil mengambil rupa dalam konteks Malaysia. Oleh itu, MPC 2026 merupakan satu langkah ke arah identiti Katolik Malaysia yang lebih kukuh, berakar dalam Kristus, setia kepada Gereja sejagat, dan hidup dalam pelbagai budaya, bahasa, serta komuniti yang menjadikan Malaysia sebagai rumah.✙

Diterbitkan oleh: Archdiocesan Pastoral Institute (API) | Emel: api@archkl.org

NEWBEC

NEW WAY OF BEING CHURCH | Hari Minggu Biasa Ke-19 | 9 Ogos 2026

BERJALAN BERSAMA KE ARAH SEBUAH GEREJA SINODAL DAN PROFETIK

Umat Untuk Pemuridan Misionari

FOKUS BULANAN: MASYARAKAT: Kesatuan Dalam Kepelbagaian

MPC 2026: Ke Arah Identiti Katolik Malaysia yang Lebih Kukuh

Kadang-kadang kita lupa akan kepelbagaian Gereja Katolik di Malaysia yang sangat luar biasa. Kita bercakap tentang perpaduan, tetapi jika kita tidak berhati-hati, perpaduan boleh perlahan-lahan menjadi keseragaman. Kita mungkin mula berfikir bahawa untuk menjadi Gereja, semua orang mesti berdoa, bertutur, mengatur, dan mengungkapkan iman dengan cara yang sama. Namun, itu bukanlah realiti Malaysia kita.

